



Comunicado di Prensa

20 di februari 2020

Cft: "Progreso solido rekeri riba diferente tereno"

Philipsburg – Colegio di Supervision Financiero di Corsou y Sint Maarten (Cft) ta pidi gobierno interino cu insistencia pa realisa progreso riba diferente tereno. Mester aproba e presupuesto di 2020 mas pronto posibel. Ademá mester tuma medida pa controla e gastonan y mehora cobramiento di impuesto, di moda cu compensacion di e deficitnan anterior por tuma luga for di 2021. Tambe ta necesario pa mehora e ciclo di presupuesto y responsabilisacion y reduci e atrasonan grandi den compilacion y aprobacion di e cuentanan anual.

Ehecucion di e presupuesto di 2019

A base di e di tres reportahe di ehecucion di 2019 Cft ta constata cu Sint Maarten te y cu september 2019 a realisa un deficit mas abou cu loke a presupuesta anteriormente. E expectativa ta cu lo cera aña 2019 cu un deficit di ANG 47 miyon compara cu un deficit presupuesta di ANG 71 miyon. Sinembargo, ta keda persistentemente necesario pa tuma mas medida pa aumenta e entradanan y reduci e gastonan, pa realisa surplus presupuestario for di 2021.

Proyecto di presupuesto 2020

Cft a ricibi e proyecto di presupuesto revisa di 2020 dia 22 di januari 2020. Esaki ta muestra un deficit presupuestario di ANG 25 miyon y inversion di capital di aproximadamente ANG 62 miyon. Cft a manda su reaccion riba e proyecto di presupuesto 2020 ey dia 5 di februari y a conseha Consejo di Ministro di Sint Maarten pa no laga e proceso presupuestario di 2020 sigui haya mas retraso y pa yega awor rapidamente na un presupuesto aproba.

Mirando e deficit presupuestario di 2019 y e deficit primera pa 2020, Cft a discuti e posicion di likidez di Sint Maarten cu Ministro di Finansa y Consejo di Ministro. Den e caso aki ta na interes di Sint Maarten pa reahusta e deficit haci bira un surplus structural mas pronto posibel. Aumento di entrada, y particularmente entrada fiscal, ta indispensable den tal caso. Cft ta keda enfatisa cu restructuracion di Servicio di Impuesto mester tuma luga rapidamente y cu mester implementa medida cu ta reduci gasto.

Maneho financiero

For di aña pasa Sint Maarten tin un Plan di Mejoramento di e Maneho Financiero aproba door di Consejo di Ministro. Sinembargo, den e ultimo periodo no a realisa mejoracion concreto riba e tereno aki. Como causa ta señala e falta di capacidad di ehecucion y financiacion. E situacion aki tin como consecuencia cu e palabracion cu Sint Maarten a haci cu Colegio pa yega na un declaracion aprobatorio di accountant pa e cuenta anual di 2021 lo rekeri un esfuerzo adicional considerabel. Cft a pidi Ministro di Finansa di Sint Maarten pa no warda mas cu ehecucion di e plan.

Cuentanan anual

Sint Maarten a firma contrato pa sosten externo pa compilacion di e cuentanan anual di 2017 y 2018. Sinembargo, e atraso den finalisacion di e trayecto di responsabilisacion pa e añanan 2013 te y cu 2018 t'ey keto bay. Durante su bishita na Sint Maarten Cft a subraya e necesidad di supera e atraso aki pronto. Esaki ta rekeri accion tanto di Gobierno como di Parlamento.

Progreso di e instruccion

A base di e instruccion di Consejo di Ministro di Reino na 2015 Sint Maarten mester compensa e deficitnan di pasado, elimina e atrasonan di pago y haci e sistema di cuidado di salud y prevision di behes di e pais financieramente sostenibel. Lo por compensa e deficitnan solamente ora cu tin un surplus presupuestario. Na 2019 e atrasonan di pago a baha cu aproximadamente ANG 50 miyon y a cera acuerdo cu varios acreedor. Sinembargo, ainda e atrasonan di pago restante ta considerabel. Ainda no a presenta e proyecto di legislacion pa reforma di e sistema di cuidado di salud na Parlamento. E mesun cos ta conta pa e proyecto di legislacion pa aumento di e edad di pensioen di behes di 62 pa 65 aña. A presenta e revision di legislacion tocante pensioen di empleado publico na Parlamento na october 2018,



pero no a aprob'e ainda. E revision ey ta implica un transicion di salario final pa salario medio y un aumento di e edad pa baha cu pensioen di 62 pa 65 aña.

Demas

A informa Cft cu a firma e acuerdonan pa financiacion di e trabounan di reparacion di aeropuerto. Ta trata awor di dal rapidamente e siguiente stapnan cu ta necesario pa yega na un aeropuerto cu ta funciona bien y cu por contribui na recuperacion economico mas aleu.

Colegio di Supervision Financiero di Corsou y Sint Maarten a bishita Sint Maarten di dia 17 pa dia 20 di februari y a tene reunion cu Gobernador, Ministro di Finansa, Consejo di Ministro, e Representante Hulandes na Sint Maarten reemplasante, organo ehecutivo di Seguro di Cuido Social (SZV), Sint Maarten Medical Center (SMMC), St. Maarten Harbour Holding Company (SMHHC) y Princess Juliana International Airport (PJIA).

[Fin di e Comunicado di Prensa]

Potret:

Edgardo Lynch

Texto na e potret:

Ta na interes di Sint Maarten pa reahusta e deficit hacie bira un surplus structural mas pronto posibel.

Nota pa redaccion – no pa publicacion

Persona di contacto na Cft:

Secretariado di Colegio di supervision financiero

Ray Thuis - Secretario

Telefon (+5999) 461-9081 / (+5999) 461-9082 / (+5999) 461-9084

Email info@cft.cw

Internet www.cft.cw

Persona di contacto cu Prensa:

Jefka Martina

Telefon (+5999) 512-6861